

FRIÛL: I SÎTS PATRIMONI MONDIÂL DE UNESCO

La Italie e je il Paîs cul numar plui alt al mont di sîts ricognossûts tant che Patrimoni Mondîâl de Umanitât de UNESCO. A son lûcs cuntun valôr

universâl, impuartants sedi dal pont di viste culturâl che naturalistic par ducj i oms e lis feminis dal mont. Di chescj sîts, a 'nd è fintremai cinc in Friûl.

DOLOMITIS FURLANIS

Forsit e je la part plui incontaminade di dut il grup dolomitic: Patrimoni Mondîâl de UNESCO dal 2009 incà, lis Dolomitis Furlanis a àn un valôr gjeologjic, naturalistic e paisaggjistic straordenari. Achi, plui che no in altris lûcs, si pues amirâ dute la fuarce de nature.



AQUILEE

Ricognossude tra lis citâts plui impuartantis dal Imperi roman, Aquilee e je po dopo diventade capitâl dal Stât patriarcjâl furlan. E je Patrimoni Mondîâl de UNESCO dal 1998 pe impuartance des sôs areis archeologjichis e pe bielege dai mosaics dai paviments de basiliche patriarcjâl.



CIVIDÂT

Inte liste dal Patrimoni Mondîâl de UNESCO dal 2011, la citât di Cividât e je stade une vore impuartante pe storie europeane. Fondade, daûr de tradizion, di Juli Cesar, e je diventade la capitâl dal prin Ducât langobart in Italie. I monuments che a fasin part dal sît a son il Templut langobart e il complès episcopâl.



PALME

Un esempli perfet di citât fuartece, innomenade pe sô plante a stele a nûf pontis, dal dut simetriche e formade di trê cenglis di muris, Palme e je diventade Patrimoni Mondîâl de UNESCO tal 2017. Fondade tal 1593, e je tal stes timp ancje un model di citât ideâl dal Rinassiment.



PALÙ DE LIVENCE

La aree umide des risultivis de Livence e dave acet al sît neolitic di palafitis di Palù de Livence. Dal 2011 incà, il sît si è zontât ae liste dal Patrimoni Mondîâl de UNESCO in graciis des sôs particolaritâts archeologjichis. Cun di plui, al è ancje un lûc di grant interès naturalistic.

